

5 MAR 1996

MAHATHIR RAI PERAYAAN BERKEMBAR BERSAMA KELUARGA JPM

KUALA LUMPUR, 5 Mac (Bernama) -- Perdana Menteri Datuk Seri Dr Mahathir Mohamad dan Datin Seri Dr Siti Hasmah Mohd Ali hari ini menghadiri majlis sambutan Hari Raya Aidilfitri dan Tahun Baru Cina bersama seluruh kakitangan Jabatan Perdana Menteri.

Majlis jamuan tengah hari itu berlangsung di Kelab Bukit Perdana, Jalan Datuk Onn dan dihadiri kira-kira 2,000 orang.

Dalam ucapan ringkasnya Dr Mahathir, yang mengucapkan Selamat Hari Raya Aidilfitri dan "Gong Xi Fa Cai" berharap tahun ini akan membawa lebih banyak nikmat kepada semua.

Sambil berseloroh beliau berkata, perayaan hampir serentak bagi umat Islam dan masyarakat Cina tahun ini boleh dipanggil "kongsi raya".

Dr Mahathir dan Dr Siti Hasmah juga memotong kek berbentuk buku sebagai tanda perasmian majlis sambutan itu. Para tetamu dihiburkan dengan persembahan nyanyian.

Yang turut hadir Menteri-menteri di Jabatan Perdana Menteri Datuk Abang Abu Bakar Mustapha dan Datuk Chong Kah Kiat, Timbalan Menteri-timbalan menteri di Jabatan Perdana Menteri Datuk Raja Ariffin Raja Sulaiman, Datuk Dr Ibrahim Saad dan Datuk Mohamed Nazri Abdul Aziz, Setiausaha Parlimen di Jabatan Perdana Menteri Haji Azmi Khalid dan Ketua Setiausaha Negara Tan Sri Ahmad Sarji Abdul Hamid. -- Bernama.

AFY AHH